



Cusseglier guvernativ Hansjörg Trachsel (san.) cun Urs Schädler, il president dals interprendiders grischuns. FOTOS G. N. STIGIER

«Blers èn memia bainstants e pultruns»

Uniun grischuna d'artisanadi e mastergn

DA GION NUTEGN STIGIER / ANR

■ **Trair pli curt la tschinta, quai hajan en l'avegnir tuts quels che han in affar, è Urs Schädler, il president dals interprendiders dal Gischun, persvas. Undrà è vegnì tar la radunanza da delegads ad Arosa cusseglier guvernativ Hansjörg Trachsel. Il premi d'innovaziun da quest onn ha retschet Men Juon da Scuol.** En noss chantun è l'Uniun grischuna d'artisanadi e mastergn cun ses rund 3500 commembers la pli gronda uniun da l'economia. Ultra da quai unescha ella er las 32 federaziuns professiunalas cun 3000 commembers. Venderdi passà è l'Uniun da commerzi e mastergn Arosa stada ospitanta da delegads e delegads da las 34 secziuns e da las 32 federaziuns professiunalas ch'appartegnan a l'uniun tetgala che reunescha tuts interprendiders grischuns. President da l'Uniun grischuna d'artisanadi e mastergn è Urs Schädler. Suentar il gea dal suveran svizzer a l'iniziativa da las abitaziuns secundaras, suentar il na tar ils gieus olimpics en noss chantun e tar l'actuala politica d'immigraziun vegnia er il Gischun a s'accoscher quella miraglia. Da refusar in process da midada saja dentant in indizi che blers sajan simplamain anc memia bainstants, ritgs e cunzunt er pultruns, ha ditg il president als preschents. «Uss avain nus da far punts per il futur e perquai duvrain nus in cumpromiss politic ed en spezial er bunas cundiziuns da basa», ha punctuà il president.

Damain iniziativas e damain leschas

Urs Schädler è però er da l'avis che mastergn ed industria dal Gischun hajan en il futur tuttina schanzas da guardar positiv en l'avegnir. Blers manaschis produtgeschan qualitativ products excellents e hajan cun lur servetschs schizunt nischas. Tut las regiuns da noss chantun disponan gliud da professiun da qualitad e quai er tar la nova generaziun. Ina giada dapli ha Urs Schädler fatg attent als represchentants da la politica che ina reduziun da la taglia fiss bain er in aspect per meglierar la situaziun economica. L'impressari da Cuir a è er da l'opiniun che damain leschas, iniziativas, alianzas e restricziuns fissan segir da beneventar. Ultra da quai chaschunan quellas tendenzas in burdi finanziar e persunal per mintga manaschi. Er tar il turissem haja il Gischun anc in grond potenzial e quai saja da promover: la natira, il turissem miaivel, il turissem da sanadad e cunzunt er il turissem per seniors.

Vurdar pli bain dals clients

Accetà è lura er vegnì il quint annual da l'Uniun grischuna d'artisanadi e mastergn. Tar antradas ed expensas dad 1,052 milliuns francs sera quel cun in gudogn dad 8469 francs. Er quest onn ha lieu a Cuir dals 5 fin ils 9 da november l'exposiziun professiunala «Fiu-tscher». A quella spetgian ins bunamain dieschmilli persunas e da quellas 4500 scolaras e scolaras. Per quella promozziun da professiuns investescha l'uniun tutti-

na 700 000 francs. Bler applaus ha retschet cusseglier guvernativ Hansjörg Trachsel cun ses plets da cumia. In tagl tras quels passa 3000 artitgels scrits en las gasettas «Südostschweiz» e «Bündner Tagblatt» ha testiftgà ch'il schef dal departament d'economia publica e fatsgs socials ha ils ultims diesch onns fatg buna lavur, tiers il naufragi dals gieus olimpics, la reggia da Domat e la finanziaziun turistica. A pled è er vegnì Duri Campell, il vicepresidente dal cussegli grond. El ha cunzunt supplitgà ils patruns ed impresaris da guardar pli bain dals clients fidavels, tgirar quels e cunzunt er ils clients dal maun public sco las vischnancas etc.

«Son Jon» in paradys per chavaliers

Dapi intgins onns surdat l'Uniun grischuna d'artisanadi e mastergn in premi d'innovaziun dotà cun 3000 francs. Cun surdar quel premi vul l'uniun cunzunt remunerar invenziuns, lavurs da pionier ed il curaschi per sviluppar novas ideas. Tuts quels aspects correspundan er tar il manaschi «Son Juon» a Scuol da Men Juon. Cun sia partenaria Brigitte Prohaska maina el cun bler cor e plaschair gia blers onns il bain puril per chavals «Son Jon». Quel bel lieu è en il fratemp er daventà ina ferma pitga per il turissem, ha il bain puril in restaurant public e 42 letgs per giasts. «Son Jon» è en vair senn er in paradys betg mo per chavals, mabain er per chavaliers. Da preschent ha Men Juon 40 agens chavals e 20 chavals en pensiu.



Pencularas e banca reunidas: Silvio Schmid, president Grischun Pencularas ed Alois Vinzens, directur da la Banca chantunala (da san.).



Han terminà cun success ina scolaziun da professiun supplementara da l'uniun: Susanne Gartmann, Val (a san.) ed Ursina Ragetli, Trin Mulin (da san.).



Ina discussiun tranter quatter visitaders da la radunanza: Rudolf Pazeller, Tarasp, Godi Hohenegger, Müstair e Markus Guler, Arosa (da san.).



Da Surmeir ad Arosa en vegnids il spazzatgamin Alois Föhn ed il pasterner Mario Baselgia (da san.).



Dus umens da la politica ed in turisticher: Duri Campell, Jon Domenic Parolini e Vendelin Coray (da san.).



Da la partida a la radunanza en er stads Ciril Collenberg (a san.) e Roland Cathomas.